

## 每週經課朗誦經文(巴克禮台語漢字)2013/08/04

### 共同經課 - 1 何西亞書十一章一節~十一節

1 以色列做囡仔的時，我疼伊，閣召我的子出埃及地。2 愈叫in，in愈走開，獻祭佇諸個巴力，燒香佇偶像。3 我教以法蓮學行，牽伊的手，總是in毋知我醫好in，4 我用慈惠的索及仁愛的帶牽in；我款待in親像對in的頷頸解開in的軛者，用糧草下佇in面前。5 伊無閣倒去埃及地，亞述欲做伊的王，因為伊毋肯倒轉。6 刀劍欲到伊的城，毀壞in的門榿，因為in的計謀吞滅。7 我的百姓決意欲背我；雖然有人叫in歸向至高者，總是無一個尊重伊。8 以法蓮啊，我豈可會棄揀你？以色列啊，我豈可會將你交互人？我豈可會互你親像押瑪？豈可會款待你做洗扁？我回心轉意，我慈愛的心真熱，9 我無欲發出我猛烈的受氣，也無閣毀滅以法蓮。因為我是上帝，毋是世間人，是佇恁中間的聖者；我無欲佇受氣中臨到恁。10 耶和華欲親像獅啲哮，in欲隨伊來行。伊哮的時，許個子就愕愕倣對西方趕緊來。11 in欲愕愕倣親像雀鳥仔對埃及緊緊來，閣親像鴿仔對亞述地到。我欲互in倚起家己的厝。這是耶和華講的。

### 共同經課 - 2 詩篇一百零七篇一節~九節，四十三節

1 恁著感謝耶和華，因為伊是好；因為伊的慈愛永永佇啲！2 耶和華所救贖者著講這話，就是伊對對敵手中所救贖者，3 對逐國，對東對西，對南對北，所聚集的攏著按呢講。4 in佇曠野拋荒的路漂流，尋無城通倚起，5 也枵也嘴乾，in的心神昏去。6 in就佇苦難中哀求耶和華；伊對in的患難中拯救in，7 閣導in行直的路，互in去到通倚起的城。8 為著耶和華的慈愛及伊對世間人所行的奇事願人攏謳啲伊；9 因為伊互迫切欣慕的心得著知足，互枵餓的心得著好物夠飽。43 見若有智慧的人，欲關心諸個代誌，亦欲數念耶和華的慈愛。

### 共同經課 - 3 歌羅西書三章一節~十一節

1 所以，恁若曾及基督同復活，就著求佇頂面的事；基督佇遐坐佇上帝的大旁。2 著致意頂面的事，毋通致意地上的事。3 因為恁曾死，也恁的活命及基督相及囡佇上帝。4 基督是咱的活命，到伊顯明的時，恁也欲相及顯明佇榮光的中央。5 所以，恁著拍死恁佇地裡的百體，就是姦淫、污穢、邪的心情、歹的私慾、及貪心（就是拜偶像）。6 因為對諸個事，上帝的受氣臨到悖逆的人。7 恁活佇in中間的時，也曾行佇諸個。8 若是此霎恁也著除去諸個一切的事，就是怨恨、受氣、惡毒、誹謗，及嘴內見誚的話。9 莫得講白賊相騙；因為恁已經褪去舊的人及伊的行做，10 也有穿新的人，就是日日換新到得著知識，照創造伊者的像。11 其中無有分別希利尼、猶太、割禮的、無割禮的、化外的人、西古提人、做奴僕的、自由的，獨獨基督是萬有，閣佇萬有中。

### 共同經課 - 4 路加福音十二章十三節~二十一節

13 眾人中有一人給伊講：「先生啊！請你教我的兄弟及我分祖業。」14 若是耶穌給伊講：「你此個人啊！是誰設立我做恁的審判官，抑是做分家業的嗎？」15 就對眾人講：「著謹慎約束家己，攏無貪心，因為人的活命不在伊所積聚的豐盛。」16 就用譬喻對in講：「有一個富人伊的田園真好收；17 伊想來想去講：『我無所在通囤我的土產，今欲怎樣？』18 閣講：『我欲按呢做：欲拆我的粟倉，起卡大的，就我的五穀及財物攏欲囤佇遐，19 也欲給我的靈魂講：靈魂啊，你有多多財物積聚，做多多年的路用，通清閒飲食快樂！』20 若是上帝給伊講：『戇人啊，今暝欲對你討你的靈魂；就你所備辦的欲歸甚麼人啊？』21 見若為著家己積聚財寶，佇上帝的面前無好額的，也是按呢。」